



Se al jere un che al saveve une vore ben ce che a son lis prepotencis, chel al jere Purciel. Purciel che no si clamave di sigure cussì, ma che aromai lu cognossevin ducj cun chel non, a scuele, soregut par i milante dispiets che i fasivin e che spes altri no jerin che ats di sfolmenade violence gastronomiche. Purciel, cu la sô tressadure imponente, al varès podût comedâ ducj chei bravats che lu tormentavin in doi e doi cuatri a fuarce di scufiots. Ma lui nol faseve mai riviel.

«Supo Purciel! Mangje cheste bontât!»

«Purcielat! Purcielat! Gloti dut jù pal gargat!»

«Bon, nomo? Scometin che tu vûs une altre sedonade?»

E denant di lui no jerin mica porcariis, come che o crodês. A jerin pitancis che cjapadis une par une a jerin normâls, si no fintremai golosis; ma tai messedots che i vignivin proponûts a diventavin plats di sgrisulâsi e dâ di stomi.

Brovade e cjocolate. Salam cu la mîl. Barecocui tal muset. Gubane cu la maionese. Frico e paneton...

A fasevin a gare a intivâ i miscliçots plui fûr cu la cassele e stomeôs, obleantlu a mangjâ e a fâ ancje muse di sodisfazion.

Purciel al taseve. Al taseve e al mangjave. Al veve tasût ancje cuant che a vevin tacât a dâi polente e furmiis o un pagnut cu la sopresse e i zupets.

Cuasi nissun si veve domandât cemût che al rivàs a sopuartâ dut. Anzit... a tancj, cuant che a fuarce di insisti i mostrave la muse schifade e si refudave di finî, i pareve che al fasès fente. Che lu fasès tant par fâju contents.

Dome cuant che al veve passade une buine etât, sul *International Journal of gastronomy and food science*, riviste che in chel an lu nomenave Chef plui babio di dut il mont, Purciel al veve confessât che a lui chei pastròs che lu obleavin a parâ jù i plasevin une vore! Al jere di chei che al veve tirât fûr lis sôs ideis plui inovativis, che cumò lu vevin rindût siôr e inomenât.

di Rafaël Serafin

#942